

PROPOSICIÓN SOBRE O COIDADO E REHABILITACIÓN DA IGREXA DE SANTA SUSANA E O SEU RECINTO

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **PROPOSICIÓN**:

EXPOSICIÓN DE MOTIVOS

A igrexa de Santa Susana aséntase no cumio da Alameda. Un espazo singular cheo de valores naturais, espaciais e patrimoniais que o dotan dun interese especial para coñecer a historia e a evolución da cidade.

O edificio da igrexa, tal e como o vemos hoxe, foi construído entre os séculos XVII e XVIII, sobre unha elevación do terreo con posibilidades defensivas, quizais un remoto castro, coa denominación tradicional de Outeiro dos Poldros. O templo aproveitou o emprazamento e mesmo elementos arquitectónicos e artísticos dunha antiga capela románica construída nos primeiros anos do século XII pola vontade do Arcebispo Xelmírez, concibida para acubillar as reliquias procedentes de Braga atribuídas á mártir romana que, co tempo, acabaría por compartir o padroado da cidade co Apóstolo Santiago.

A pequena capela románica, citada xa no Códice Calixtino comezou a poñer en valor un lugar daquela arredado do burgo medieval, que iría gañando importancia despois de que o Concello comezara a celebrar alí as súas xuntanzas, coa doazón dos terreos á cidade por parte do Conde de Altamira a mediados do século XVI, a posterior consagración da igrexa de nova planta e a creación na zona do gran parque natural da cidade integrando a antiga carballeira. A construción das escaleiras de conexión co Paseo da Ferradura cara a 1903 contribuíu a integrar aínda máis o enclave no conxunto da Alameda e na vida cidadá.


Os arredores da igrexa de Santa Susana foron tamén durante centos de anos, como o son aínda hoxe, lugar para o lecer e o divertimento da veciñanza de Santiago, posto que hai constancia de que polo menos desde o século XVI se utilizaba o lugar para as celebracións pagás da festa do Apóstolo, alternando coas periódicas feiras de gando baixo que se manterían ata 1971, ano no que se decidiu o seu traslado a Salgueiriños.

Deste xeito, co decorrer dos anos a consideración do antigo Outeiro dos Poldros como territorio extramuros foi mudando cara unha percepción de maior centralidade axudada polo crecemento urbano da cidade cara ao sur, o que acabou reforzando a importancia daquel conxunto cun maior valor paisaxístico que incrementar aos tradicionais históricos e culturais.

Desde hai anos o Concello vense facendo cargo do mantemento e conservación do recinto da igrexa de Santa Susana en función dun acordo tácito acadado coa parroquia que cedeu para uso municipal unha edificación dentro do propio recinto.

A pesar dalgunha atención municipal, o conxunto presenta desde hai meses un estado completo estado de abandono, cuestión que foi advertida hai meses polo Grupo Municipal Popular sen que se lle puxera solución.

A relación de desfeitas e estragos é extensa: desde as pintadas na portada principal románica, portas laterais e paredes de cantería, ata a rotura das fiestras e cristais da igrexa



e da construción próxima. A iso hai que engadirlle a destrución dos focos colocados no seu día para lograr a iluminación desde o solo das paredes da igrexa.

A mellora da igrexa non admite demora, non só pola pésima imaxe que ofrece, senón porque a falta de cristais ocasiona a entrada de auga e de aves, circunstancia que está a deteriorar o interior do templo, onde se conservan importantes elementos artísticos, entre eles, un retablo datado en 1709.

A actuación que se leve a cabo debería incluír medidas de vixilancia que eviten novas pintadas e roturas, tal e como veu acontecendo ultimamente facendo inútil calquera labor de limpeza ou reposición.

A ausencia de seguridade e a reiteración ruínosa dos danos fan inesixible calquera requirimento á parroquia, pois malia que esta se mostra disposta a recuperar ou arranxar a igrexa todo apunta a que os estragos se volverán a producir. A Policía Local non pode asegurar, cos seus efectivos humanos, a indemnidade do recinto, de tal xeito que a súa indemnidade só se poderá asegurar a través dunha instalación de videovixilancia, semellante ás que desde hai anos, e coas renovacións tramitadas polo actual goberno, serve de mecanismo de protección doutros contornos patrimoniais, a pesar de ser máis transitados e habitados


Á vista do que antecede, e para evitar que continúe o aspecto de abandono impropio e impropcedente da igrexa de Santa Susana e o seu contorno tendo en conta a súa historia e os moitos valores que atesoura, o Grupo Municipal propón a adopción do seguinte

ACORDO

O Pleno do Concello insta ao correspondente órgano do Goberno a:

- 1. Asinar un convenio de colaboración co órgano eclesiástico que corresponda no que se inclúa a cesión formal do local situado nas proximidades da igrexa que desde hai anos vén empregando o Concello e se concrete a obriga da Administración local de manter e conservar o recinto.***
- 2. Que polos seus medios ou en colaboración co Consorcio de Santiago, acometa de forma preferente as obras e o financiamento para a recuperación da igrexa de Santa Susana e a tramitación e instalación dun sistema de vixilancia e control permanente do recinto de Santa Susana, que contribúa a disuadir e evitar así a proliferación de actos vandálicos nese ámbito.***

Santiago de Compostela, a 27 de febreiro de 2018



Agustín Hernández
Portavoz do Grupo Municipal Popular

- Sr. Alcalde do Concello de Santiago de Compostela